

四庫全書

集部

欽定四庫全書

古詩紀卷十

明 馮惟訥 撰

古逸第十

古諺

太公兵法引黃帝語

日中不彗是謂失時操刀不割失利之期執斧不伐賊
人將來

叶陵
之反

涓涓不塞將為江河熒熒不救炎炎奈何

兩葉不去將用伐柯為虺弗推行將為蛇

叶唐何反
賈子書引止

日中必昃操刀必割二句其餘見太公兵法即漢藝文志黃帝中機銘也

六韜

天下攘攘皆為利往天下熙熙皆為利來

管子

二章

不行其野不違其馬

諷桓公○言馬以行野雖不行野亦不可不調習也

牆有耳伏寇在側

孔子家語

相馬以與相士以居

曾子

人莫知其子之惡莫知其苗之碩

孟子 二章

吾王不遊吾何以休吾王不豫吾何以助一遊一豫為

諸侯度

夏諫○劉熙曰春行曰遊秋行曰豫左傳季氏有嘉樹韓宣子譽之服虔曰譽與豫同遊於樹

下也唐宋之間
詩春豫臨池會

雖有智慧不如乘勢雖有鎡基不如待時

齊人有言○
賈逵曰鎡基

稱也呂氏春秋曰
搏六寸所以間豫

左傳

二十章

山有木工則度之賓有禮主則擇之

度音宅○魯羽父引周請隱十二年

匹夫無罪懷璧其罪

虞叔引周請桓十年

心苟無瑕何恤乎無家

晉士蒍引請閔元年

輔車相依唇亡齒寒

虞宮之奇引請僖五年○輔頰也車牙車又曰頷車牙上骨之名也

輔為外表

車是內骨

心則不競何憚於病

鄭大夫孔叔言于鄭伯僖七年○言心既不能自強何畏難於卑弱

之病即齊景公所云既不能令又不

受命也左傳既不能強又不能弱

庇焉而縱尋斧焉

文二年宋昭公欲去羣公子樂豫曰公族公室之枝葉也葛藟猶能庇其

本根況君子乎諺所謂云云者也註八尺曰尋所以量木也借木之庇而縱故尋以量之斧以伐之

畏首畏尾身其餘幾

鄭子家引古言文十七年

鹿死不擇音

同上○言當作蔭蔭蔭也

雖鞭之長不及馬腹

言非所當擊晉伯宗引古言宣十五年

高下在心川澤內汚山藪藏疾瑾瑜匿瑕國君含垢

諺同

上○漢書亦引此無高下在心一句

民之多幸國之不幸也

羊舌職引諺宣十六年

殺老牛莫之敢尸

晉韓厥引古言晉樂書中行偃執厲公召韓厥厥辭曰古之人有言云云

而況君乎

成十七年

非宅是卜維隣是卜

晏子引諺
昭三年

挈餅之知守不假器

晉人來治杞田季孫將以成與之
謝息為孟孫守不可曰人有言曰

雖有云云禮也
昭七年

其父析薪其子弗克負荷

子產引古
言昭七年

室於怒市於色

楚令尹子瑕諫歸蹶由昭十二年
○戰國策怒於室者色於市

臣一主二

晉人執季孫意如子服惠伯私於中行穆子曰魯兄弟也土地猶大所命能具若為夷棄

之使事齊楚其何瘳於晉訪曰

云云吾豈無大國昭十三年

無過亂門

子產引訪昭十九年○昭二十三年宋人對楚蘧越曰人有言曰惟亂門之無過國語太

子晉陳壘穀洛人有

言曰無過亂人之門

發不恤其緯而憂宗周之隕為將及焉

子大叔對范獻子人亦有言云

云昭二

十四年

唯食忘憂

魏子引訪昭二十九年○國語作唯食可以忘憂

民保於信

戲陽遠引訪定十五年

飛矢在上走驛在下

兵交使在其間今語兩國兵交不罪來使

國語

十章

兄弟讒閱侮人百里

周語富辰諫以翟伐鄭人有言曰云云周文公之詩曰兄弟閱于牆

外禦

其侮

獸惡其網民惡其上

周語晉克楚使卻至告慶于周召桓公與之語至自稱功伐召桓公

以告單襄公公曰君子不自稱也惡其蓋人也其抑下滋甚故聖人貴讓且諂曰云云

兵在其頸

同上單襄公曰人有言云云其卻至之謂乎

佐雖者嘗焉佐闕者傷焉

周語太子晉諫壅穀洛人有言云云今俗語助祭得食助

闕得

傷

禍不好不能為禍

同上財色之禍生於好之

衆心成城衆口鑠金

周語伶州鳩對景王引諺

從善如登從惡如崩

周語衛彪儻引諺

黍稷無成不能為榮黍不為黍不能蕃牖稷不為稷不

能蕃殖所生不疑惟德之基

晉語晉公子過鄭鄭文公不禮叔詹諫不聽曰若不

禮焉則請殺之諺云云註為黍為稷之為成也所生謂種黍得黍種稷得稷唯在所樹言禍福亦猶是也

狐狸之而狐搢之是以無成功

吳語吳伐越越使諸搢郢行成於吳云云今天

王既封殖越國又刈亡之雖四方諸侯則何實以事吳

觥飯不及壺飧

越語越將伐吳數問於范蠡范蠡曰未可也王姑待之王曰諺有之云云今歲

晚矣子將奈何注歲饑未具不如壺飧之救饑疾也

說苑

囊漏貯中

鄒穆公引周諺

列子

三章

生相憐死相捐

楊朱篇引古語

人不婚宦情欲失半人不衣食君臣道息

古語

田父可坐殺

周諺云云晨出夜入自以性之恒暇殺茹藿自以味之極一朝處以柔毛絺幕薦以

梁內蘭稿心痛體
煩內熱生病矣

莊子

三章

聞道百以為莫己若

野語

美成在久

叶苟起反

惡成不及改

叶苟起反
○古語

衆人重利廉士重名賢士尚志聖人貴精

荀子

二章

衣與繆與不女聊

子道篇引古言與音歟聊音留叶力
糾反言雖衣服我綢繆我而不敬不

順則不
聊汝也

欲富乎忍恥矣傾絕矣故舊矣與義分背矣

大畧篇引
民語傾絕

謂傾身絕命而求也分
背如人分背而行也

魯定公記載古語

寧得一把五加不用黃金滿車寧得一把地榆不用明

月寶珠

臯魚引古語

枯魚銜索幾何不蠹

索音素
古通

慎子

名劉先申韓
申韓稱之

不聰不明不能為王不瞽不聾不能為公

韓非子

奔車之上無仲尼覆舟之下無伯夷

奔音漬

呂覽

居者無載

議作摠

行者無埋

叶陵之反○齊鄙人諺言生不隱謀死不隱忠也

鄒子引古語

名衍齊人

截趾適履孰云其愚何與斯人追欲喪軀

鷗冠子

楚人居深山以鷗鳥羽為冠

中流失船一壺千金

船音循釋名船循也循水而行也
文子曰上下揖而下致船上言若

緣下言

若綸

魯仲連引古諺

漢藝文志有
魯仲連子

百足之蟲三斷不蹶

墨子云馮公之蟲三斷不僵
馮公蟲名僵讀鞠躬之躬

魯連子

心誠憐白髮玄情不怡艷色嫵

鬼谷子引古語

女愛不做席男懽不盡輪

戰國策寵女不做
席寵臣不敝軒

孔叢子

堯舜千鍾孔子百觚子路嗑嗑尚飲十榼

平原君與子高飲強子高

酒曰昔有遺謗云云古之聖賢無不能飲也吾子河辭焉子高曰聖賢以道德兼人未聞以飲食也

戰國策

十三章

戰勝而國危者物不斷也功大而權輕者地不入也

秦策

秦攻趙蘇秦謂秦王曰語云云

削株掘根無與禍隣禍乃不存

張儀說秦臣聞之云云

騏驥之衰也驚馬先之孟賁之倦也女子勝之

齊策蘇秦說齊

溥王曰

語云云

見君之乘下之見杖起之

楚策或謂黃齊曰諺云云今王善富彊而公不善也是不

臣也下音戶

起音去上聲

見兔而顧犬未為晚也亡羊而補牢未為遲也

楚策莊辛對楚

襄王曰臣聞鄙語云

云牢一本作籬音同

痛疾憐王

荀卿謝春申君痛疾憐王此不恭之語也雖然不可不審察也此為刼弑死亡之主言也

註云痛雖惡猶愈

于刼弑故反憐王

以書為御者不盡馬之情以古制今者不達事之變

趙策

趙武靈王始出胡服之令羣臣皆諫止王王曰諺云云○亦見史記

借車者馳之借衣者被之

孟嘗君揮舍人以為武城吏而遺之曰鄙語豈不云云註

云言弗愛也

被叶音披

寧為雞口無為牛後

韓策蘇秦為趙合從說韓曰臣聞鄙語云云顏氏家訓曰按廷薦職

國策音義曰尸雞中之主從牛子也然則口當為尸後當為從俗寫誤也

禽困覆車

韓策向壽為秦守宜陽將以伐韓韓公仲使蘇代謂向壽云云譬禽獸得急困猶能抵觸

頗覆人車○亦見史記

貴其所以貴者貴

韓策蘇代說向壽請毋伐韓諺云云註所以貴人所同貴○亦見史記

仁不輕絕智不輕怨

燕策燕王喜以書謝樂間曰語云云

厚者不毀人以自益也仁者不危人以要名也

同上
諺曰

史記

二十
二章

死者復生生者不愧

趙世家肥義謂李兌曰諺云云言不忍負武靈王之屬已也

美女入室惡女之仇

外戚世家漢武帝幸夫人尹嬖奸見邢夫人低頭俛而泣自痛其不

如也諺

云云

蓬生麻中不扶自直白沙在泥與之皆黑

三王世家引傳曰○曹子

書作

諺曰

當斷不斷反受其亂

黃歇傳
贊引語

千羊之皮不如一狐之腋

叶戈
灼反

千人之諾諾不如一士

之諤諤

衛鞅傳趙良
謂商君云云

積羽沈舟羣輕折軸衆口鑠金積毀銷骨

張儀傳張儀
說魏王臣聞

云云戰國策註云周語也漢中山王傳臣聞
衆口銷金積毀銷骨羣輕折軸羽翮飛肉

力則任鄙智則樗里

樗里子傳樗里秦惠王異母弟樗
里子滑稽多智秦人號曰智囊諺

云云

利令智昏

虞卿傳贊
引鄙諺

尺有所短寸有所長

王翦傳贊
引鄙語

鑒于水者見面之容鑒于人者知吉與凶

蔡澤傳○本
武王鏡銘

長袖善舞多錢善賈

蔡澤傳太史公曰韓子
稱云云韓子韓非子也

白頭如新傾蓋如故

鄒陽傳
引古語

千金之子不垂堂百金之子不騎衡

叶寒剛反○袁盎
傳盎對文帝臣聞

云云服虔曰措身不倚衡
也如淳曰衡樓殿邊欄楯

變古亂常不死則亡

晁錯傳
贊引語

雖有親父安知不為虎雖有親兄

叶虛
王反

安知不為狼

韓安

國傳安國諫

梁孝王引語

强弩之極矢不能穿魯縞衝風之末力不能漂鴻毛

同上

安國與王恢論伐匈奴○漢書曰衝風之末不能起毛羽强弩之末不能入魯縞

桃李不言下自成蹊

李廣傳贊引諺

家象千金坐不垂堂

司馬相如諫獵疏引鄙諺

人貌榮名豈有既乎

郭解傳贊引諺○徐廣曰人以顏狀為貌者則貌有衰落矣唯用榮

名為飾表則稱譽無極也既盡也

千金之子不死于市

貨殖傳引諺○尉繚子千金不死百金不刑

百里不販樵千里不販糴

貨殖傳引謗

以貧求富農不如工工不如商刺繡文不如倚市門

見貨

殖傳非謗也或末句謗耳一無以貧求富句

漢書

十五章

有病不治

平聲

常得中醫

藝文志引謗

狡兔死走狗烹

叶鋪郎反

飛鳥盡良工藏敵國破謀臣亡

韓信

傳六韜作高鳥○史記曰野禽彈走犬烹敵國破謀臣亡

兒婦人口不可用

王陵傳呂太后謂陳平曰鄙語云云顧我與君何如耳無畏呂嬖之譖

不習為吏視已成事

賈誼引鄒諺○大戴禮
不習為吏如視已成事

前車覆後車誠

同上

欲投鼠而忌器

同上
里諺

社鼯不灌屋鼠不薰

中山王引○韓詩
外傳作攫蜂不薰

孰為為之孰令聽之

司馬遷
引諺

良玉不琢

武帝賢良策問引古語○漢
書或曰云云不云古語也

揉曲木者不累日銷金石者不累月

公孫弘對策書云
云夫人之好惡豈

比禽獸木石之類哉期
年而變臣弘尚竊遲之

水至清則無魚人至察則無徒

東方朔○列子察見淵魚不祥知料隱隱有殃

後漢書水清無大魚此見客難不云誘也

以管窺天以蠡測海以建撞鐘

東方朔引古語史記扁鵲曰以管窺天以隙視

丈

腐木不可以為柱卑人不可以為主

劉輔引里語成帝欲立趙婕妤好為皇

后輔上

書陳

千人所指無病而死

哀帝益封董賢二千戶賜三侯國王嘉上封事諫上引里語

括糠及米

漢書引語

後漢書

九章

人所歌舞天必從之

王莽遣更始將軍廉丹討山東辟馮衍為掾衍說丹曰將軍之先為

漢信臣新室之興英俊不附今漢內潰人懷漢德云云○此本古語人所歌舞天必從之

貴易交富易妻

宋弘燕見上令主坐屏風後上謂弘曰請言云云人情乎弘曰臣聞貧賤之交

不可忘糟糠之妻不下堂上顧謂主曰事不諧矣

幾事不密禍倚人壁

鮑永傳荀諫戒鮑永曰幾事不密禍倚人門不謂諍也

作舍道傍三年不成

曹寔傳顯宗引諍

曉曉者易缺皦皦者易汚

上聲

陽春之曲和者必寡

叶果五反

盛名之下其實難副

音府○黃瓊傳公車徵瓊至綸氏稱疾不迎李固以書逆遺之引誘

云

關東出相關西出將

虞翻傳永初四年羗胡反亂殘破并涼大將軍欲棄涼州翻說太尉

李脩曰

翻云云

穀弩射市薄命先死

李業傳劉咸謂李業曰賢者不避害譬猶穀弩射市薄命者先死不

云誘

也

龍不隱鱗鳳不藏羽網羅高懸去將安所

陳留父老傳桓帝世黨錮

事起外黃令陳留張升去官歸鄉里道逢友人班草而言父老過之植其杖云云不謂誘也

時無赭澆黃土

東觀漢紀明德馬太后時上欲封諸舅外間白太后曰吾自念親屬皆無柱石

之功德語云云

賈誼書容經篇

君子重襲小人無由入正人十倍

叶平聲

邪辟無由來

劉向別錄引古語

唇亡而齒寒

叶胡千反

河水崩其壞在山

叶輸旃反

列女傳引古語

秋胡謂其妻云云不謂謗也傳止首二句

力田不如遇豐年力桑不如見國卿刺繡門

當作丈

不如

倚市門

風俗通

四章

金不可作世不可度

一曰金可作世可度

狐欲渡河無奈尾何

婦死腹悲惟身知之

縣官漫漫怨死者半

應劭漢官儀引里語

仕宦不止車生耳

崔豹古今註曰文武車耳古重較也文官青耳武官赤耳毛萇詩疏曰重

較卿士
之車

王符引諺

一歲數赦好兒啗啞

太平御覽崔寔政論云云

桓譚引諺

二人同術誰昭誰冥二虎同穴誰死誰生

本汲冢周書然非諺也

人之相去如九牛尾

桓子新論引諺

人聞長安樂則出門而西向笑知肉味美則對屠門而

大嚼

新論曰關東鄙語云云又諺曰侏儒見一節而長短可知孔子言舉一隅足以三隅反觀吾小時二

賦亦足以揆其能否

牟子引古諺

東漢太尉牟融

少所見多所怪

叶古遺反

見橐駝言馬腫背

劉子引古諺

劉晝字孔昭

深不絕涓泉稚子浴其淵高不絕丘陵跛羊遊其巔

師春引古語

斧小不勝柯

韓嬰詩傳引古語

昨日何生今日何成必念歸厚必念治生日慎一日完

如金城

詩疏 五章

洛鯉伊魴貴於牛羊

洛 誘

山上斫檀椽楹先殫

齊誘○椽音遂楹音兮
檀與椽楹三木相似

斫檀不諦

音提得繫

音籍

迷繫迷尚可得駁馬

駁馬亦木名
馬音如塗抹

之抹檀與繫迷駁

馬三木亦相似

疲馬不渡澠水

齊語○澠水之流迅疾

問婦人欲買楮不謂竈下有黃土欲買釵不謂山中自

有楮

上黨人語

詩正義引語

四足之美有鹿兩足之美有鵠

易緯引古語

二章

一夫兩心拔刺不深

躓馬破車惡婦破家

春秋緯引古語

二章

吐珠於澤誰能不合

月麗于畢雨滂沱月麗于箕風揚沙

叶桑何反

四民月令引農語

二章○東漢崔寔撰

三月昏參星夕杏花盛桑葉白

河射角堪夜作犂星沒水生骨

月令注引里語

蜻蛚鳴衣裘成蟋蟀鳴懶婦驚

汜勝之書引古語

汜勝之成帝時為議郎師古曰劉向別錄云使教田三輔

有奸田者師之徒為御
史汜音凡又音敷飭反

土長冒擲陳根可拔耕者急發

見月令
註農書

齊民要術引諺

五章

智如禹湯不如常耕

叶舌
郎反

耕而不勞

去聲

不如作暴

子欲富黃金覆

謂秋鋤麥也
柴覆麥根也

夏至後不沒狗但雨多溼索駝五月及澤父子不相借

積籍二音夏至

前種麻良候也

羸牛劣馬寒食下

言其乏食瘦
瘠春中必死

水經註引諺

射的白斛米百射的玄斛米千

射的山名遠望狀若射
侯土人以驗年之登否

的明則米賤
的闇則米貴

關駟十三州志

關駟燉煌人沮
渠蒙遜同時

峴山張蓋雨滂沛

方回山經引相冢書

山川而能語葬師食無所肺腑而能語醫師色如土

文選註引古諺

越阡度陌互為主客

蔣子萬機論

猛虎不處卑勢勁鷹不立垂枝

魏武選令引諺

失晨之雞思補更鳴

魏志王昶引諺

二章○王昶字文舒魏明帝時人戒兄子書引諺云云

如不知足則失所欲

救寒無若重裘止謗莫若自脩

梁史

屋漏在上知之在下

史炤通鑑疏引諺

三章

足寒傷心民怨傷國

妍皮不裹癡骨

福至心靈禍來神昧

古諺古語

載籍通引
十八章

終身讓車不枉一舍

莫三人而迷

又曰莫
衆而迷

惑者知反迷道不遠

不斑白語道失

白刃交前不顧流矢

堂前不冀除郊草不瞻耘

一淵不兩蛟

又曰一栖不兩雄
又曰兩雄不並栖

井水無大魚新林無長木

林中不賣薪湖上不鬻魚

觸露不摘葵日中不煎韭

乳犬攫虎伏雞搏狸

白壁不可為冶容多後福

將飛者翼伏將奮者足踞將噬者爪縮將文者且朴

中規不密用墜禍辟

鐸以聲自穴膏以明自鑠虎豹之文來射猿狖之捷來

獨

上求材臣殘木上求魚臣乾谷

遁關不可復亡犴不可再

無鄉之社易為黍肉無國之稷易為求福

附錄

逸詩篇名

葛天氏歌八闕

呂氏春秋葛天氏之樂三人持半尼投足以歌八闕

載民一玄鳥二

遂草木三

奮五穀四

敬天常

五

達帝功

六

依帝德

七

總萬物之極

八

伏羲駕辯

楚辭伏羲駕辯楚勞商以注伏羲琴曲

網罟

隋書樂志伏羲有網罟之歌夏侯玄辯樂論伏羲氏因時興利教民田魚天下歸之有網

罟之歌

神農氏豐年詠

辯樂論神農教民食穀有豐年之詠

黃帝龍袞頌

樂書

黃帝柷鼓曲

師藏啓筮曰蚩尤出自羊水疏首登九淖以伐劣桑黃帝征之涿鹿之野

作柷鼓之曲雲笈云黃帝出師北鹿絕轡之野以柷鼓為警衛其曲有十段各有辭其辭亡考

震雷驚

一猛虎駭

二鷙鳥擊

三龍媒蹀

四靈夢

吼

五

鵬鶚爭

六

壯士奮怒

七

熊羆哮呔

八

石盪

崖

九

波盪壑

十

伶倫渡渾歌

水經注黃帝令伶倫使于夏作

咸墨九招歌

劉勰云帝嘗之世咸墨為頌以歌九招

虞舜大唐歌

尚書大傳曰維五祀秦鍾石論人聲謏然乃作大唐之歌

招雍肆夏

孝成

尚書大傳招為賓客雍為主
人始秦肆夏納以孝成

暫陽

南陽

初慮

朱干

苓落

歸來

縵

縵

尚書大傳維元祀巡守四岳八伯璫四典注四
海封十有二山兆十有二州樂正定樂名元祀
代泰山貢兩伯之樂焉東岳陽伯之樂舞侏離
其歌聲比余謠名曰替陽儀伯樂舞襲我其歌
聲比大謠名曰南陽中祀大交霍山貢兩伯之
樂焉夏伯之樂舞謾或其歌聲比中謠名曰初
應義伯之樂舞將陽其歌聲比大謠名曰朱干
扶祀柳毅華山貢兩伯之樂焉扶伯之樂舞蔡
叔其歌聲比小謠名曰苓落和伯之樂舞玄鵬
其歌聲比中謠名曰歸來幽都弘山貢兩伯之
樂焉冬伯之樂舞齊落歌曰縵縵

○王應麟曰其歌名復闕其一

九德之歌

夏禹
周禮

候人兮歌

呂氏春秋禹行功見塗山之女禹未之
遇而巡省南土塗山氏之女乃令其妾

候而于塗山之陽女乃作歌曰候人兮猗實始
為南音○二南是其道聲及其變也流為懶音
南之為言懶
也懶與溺同

九辯 九歌

啓○山海經啓上九嬭
于天得九辯九歌以下

燕往飛歌

呂氏春秋曰昔有娥氏二女居九成之
臺飲食必以鼓天帝使燕往視之鳴若

謀隘二女愛而搏之覆以玉筐既而發視之燕
道二卵而北飛二女作歌一終曰燕燕作飛實

始為
北音

破斧歌

北甲○呂氏春秋夏后氏北甲田于東陽
賁山天大風晦冥迷入民間之室主人方

乳或曰后来乃良日也是必大吉或曰不勝也
之子是必有殃后乃携之以歸曰以為余子孰

敢殃之子長成人幕動折櫟斧斫斬其足遂為
守門者孔甲曰嗚呼有疾命矣夫乃作破斧之

歌實始

為東音

晨露

湯詩緯曰湯命伊尹振鳥陵歌晨露

淫魄

師涓為帝辛造

武宿夜

武王○禮記舞莫重於武宿夜注武曲名
○正義武王至商郊停止宿夜士卒皆歡

樂歌舞以待

旦故名焉

九夏

周禮注九夏皆詩
篇名頌之族類也

王夏

一 肆夏

二 昭夏

三 納夏

四 章夏

五 齊夏

六

族夏^七 祓夏^八 驚夏^九

繁遏渠

國語先樂金奏肆夏繁遏渠天子所以享元侯也註肆夏一名樊昭夏一名遏納夏

一名

渠

采薺

周禮行以肆夏超以采薺注逸詩○禮記作采薺

新宮

儀禮燕禮下管新宮○注小雅逸篇○按左傳宋公賦新宮大射義乃管新宮三終注管

謂吹蕩以播新宮之詩或曰怨即斯干詩

鳩飛

國語秦伯賦鳩飛注謂小苑之首章

河水

左傳晉公子賦河水國語注河當作沔

明明 崇禹 生開

遠周書世像篇益人奏萬獻
明明三終奏崇禹生開三終

注詩

篇名

辛餘靡歌

呂氏春秋周昭王南征荆右辛餘靡長
且多力為王右還反涉漢梁敗王隕于

漢中辛餘靡振王北濟王乃封之于西翟因追
思故處實始為西音○西音在秦為秦聲漢賦
云起西音于促柱歌江上之余嘆江左六朝為
清商曲唐有伊州源州皆在西方西屬金金主
聲故樂曲

盛于西也

茅鴟

左傳工誦茅鴟
註云利不敬

北里 靡靡

文中子周龍舟五更轉
之曲曰靡靡之音也

激楚

文選上林賦激楚結風○列女傳無鹽女陳齊宣王曰聽激楚之遺風

流風

陽阿

延露

梁元帝纂要曰皆古艷曲

折楊

皇琴

莊子太音不入於俚耳折楊皇琴則嗑然而笑

下里巴人

陽阿

又見前

薤露

陽春

白雪

引商刻羽

流徵

宋玉對楚王問

邪許歌

與衆協力之歌也

噓喚歌

與邪許同○劉晝曰伏臘合歡必歌采菱牽石柁舟必歌噓喚

涉江

采菱

陽阿

又見前○楚辭招魂陳鍾按鼓造新歌涉江采菱發陽阿

涉江果菱陽阿三者皆歌曲名即上句所云造新歌也誤作楊發荷解者云涉彼大江入湖池采取菱芰發揚荷此何異兒童之語乎

嘖喻

司馬相如凡將篇淮南鄭蔡舞嘖喻嘖喻曲名喻音猷

于遮

司馬相如上林賦淮南于遮注于遮歌曲名

顛歌

上林賦文成顛歌注文成遠西縣名其縣人善歌顛益州顛縣其人能作西南夷歌顛即

滇字

凱歌

周官樂師凡軍大獻教凱司馬法曰得意則愷所以樂享也漢志作凱

嬋歌

韓詩內傳○巴人嬋歌說文嬋歌巴渝曲也

歸邪之曲

蜀王本紀蜀王妃思其父母歸寧蜀王為製歸邪之曲

幽鬼之曲

蜀王本紀秦惠以美女遺蜀王不習水土而死葬之石鏡王追思之作幽鬼之

曲

離鴻

去鴈

蘋生

三曲歌春

明晨

焦泉

朱華

流金

四曲歌夏

商飈

白雲

落葉

吹蓬

四曲
歌秋

嚴凝

一曰凝河

流陰

沈靈

三曲歌冬

○王子年曰師
謂當街靈公之世寓列代

之聲造此諸曲靈公耽而惑之蘧伯玉諫曰此
雖終陽氣緯終為沈酒靡曼之音無會于風雅

靈公乃去新聲師

謂悔之退而隱


輕風流水之詩

昭霧秋霜之詩

王子年曰洞庭二山浮于水上其
下金堂數百間帝女居之四時飽

管之清音金石之淒唳徹于山杪楚懷王

與羣臣環山遊宴各舉節氣以為樂章



古詩紀卷十

欽定四庫全書

集部

古詩紀卷十一至
三

詳校官檢討

臣德生

侍讀

臣

孫球覆勘

總校官知縣

臣

楊懋珩

校對官中書

臣

李斯咏

謄錄監生

臣

朱坦

欽定四庫全書

古詩紀卷十一

明 馮惟訥 撰

漢第一

高帝

姓劉氏諱
邦字季

大風歌

一名三
侯之童

漢書曰高帝既定天下還過沛留置酒沛宮悉召
故人父老子弟佐酒發沛中兒得百二十人教之
歌酒酣上擊筑自歌令兒皆和習之帝乃起舞慷慨傷懷

大風起兮雲飛揚威加海內兮歸故鄉安得猛士兮守

四方

鴻鵠歌

古樂府作楚歌

漢書曰高帝欲立戚夫人子趙王如意因而廢太子後不果戚夫人泣涕帝曰為我楚舞吾為若楚歌其旨言太子得四皓為輔羽翼成就不可易也

鴻鵠高飛一舉千里羽翼已就橫絕四海橫絕四海又

可奈何雖有矰繳將

一作尚

安所施

武帝

諱徹景帝子

瓠子歌二首

漢書武帝紀曰元封二年四月作瓠子歌溝洫志
曰帝既封禪乃發卒數萬人塞瓠子決河還自臨
祭湛白馬玉璧令羣臣從官皆負薪塞決河時東
郡燒草以故薪少乃下淇園之竹以為捷上既臨
河決悼其功之不就為作歌詩二
章於是卒塞瓠子築宮名曰宣房

瓠子決兮將奈何浩浩洋洋

一作皓
一作盱

兮閭殫爲河殫爲

河兮地不得寧功無已時兮吾

音魚
下同

山平吾山平兮鉅

野溢魚弗鬱兮栢冬日正道弛兮離常流蛟龍騁兮放

一作

遠遊歸舊川兮神哉沛不封禪兮安知外爲我謂

河伯兮何不仁

一作皇為河
公兮何不仁

泛濫不止兮愁吾人齧桑

浮兮淮泗滿久不返兮水維緩

縣名

河湯湯兮激潺湲北渡回兮迅流難
蹇長焚兮湛

讀曰沈

美玉河伯

一作公

許兮新不屬薪不屬兮衛人罪燒蕭條

兮噫乎何以禦水隤林竹兮捷石菑

側其反

宣房塞兮萬

福來

秋風辭

漢武帝故事曰帝行幸河東祠后土顧視帝京
忻然中流與羣臣飲讌帝歡甚乃自作秋風辭

秋風起兮白雲飛草木黃落兮鴈南歸
蘭有秀兮菊有

芳懷佳人兮不能忘
汎樓船兮濟汾河
橫中流兮揚素波
簫鼓鳴兮發櫂歌
歡樂極兮哀情多少
壯幾時兮奈老何

蒲梢天馬歌

史記曰武帝伐大宛得
千里馬名蒲梢作歌

天馬徠兮從西極
經萬里兮歸有德
承靈威兮障外國
涉流沙兮四夷服

李夫人歌

漢書外戚傳曰夫人早卒帝思念不已方士齊人少翁言能致其神迺夜張燈燭設帷帳陳酒肉而令帝居帷帳遙望見好女如李夫人之貌還幄坐而步又不得就視帝愈益相思悲感為作詩令樂府諸音家絃歌之

是邪非邪立而望之翩何姍姍其來遲

姍姍行步貌先安反

落葉哀蟬曲

王子年拾遺記曰漢武帝思懷李夫人不可復得時始穿昆明之池泛翔禽之舟帝自造歌曲使女伶歌之時日已西傾涼風激水女伶歌聲甚道因賦落葉哀蟬之曲

羅袂兮無聲玉墀兮塵生虛房冷而寂寞落葉依於重

局望彼美之女兮安得感余心之未寧

栢梁詩

漢武帝元封三年作栢梁臺詔羣臣
二千石有能為七言詩乃得上坐

日月星辰和四時帝驂駕駟馬從梁來

梁王孝王武

郡國士

馬羽林材

大司馬

總領天下誠難治

丞相石慶

和撫四夷不易

哉

大將軍衛青

刀筆之吏臣執之

御史大夫倪寬

撞鐘伐鼓聲中詩

太常周建德

宗室廣大日益滋

宗正劉安國

周衛交戟禁不時

衛尉尉

路博德

總領從宗栢梁臺

光祿勳徐自為

平理清獻決嫌疑

廷尉杜周

修飾輿

一作車

馬待駕來

太僕公孫賀

郡國吏功差次之

大鴻臚壺

充蔡輿御物主治之

少府王溫舒

陳粟萬石揚呂

一作宮

箕大

農張成

徵道宮下隨討治

執金吾中尉豹

三輔盜賊天下危

左馮翊盛

宣盜阻南山爲民災

石扶風李成信

外家公主不可治

京兆尹椒

房率更領其材

詹事陳掌

蠻夷朝賀常舍其

典屬國

柱枅榑櫨

相支持

大匠

枇杷橘栗桃李梅

大官

走狗逐兔張罟罟

上林

令齧妃女脣甘如飴

郭舍人

迫窘詰屈幾窮哉

東方朔

昭帝

諱弗陵武帝第三子

黃鵠歌

西京雜記曰元始元年黃鵠下太液池帝為此歌

黃鵠飛兮下建章羽肅肅兮行蹌蹌金爲衣兮菊爲裳

唼喋

唼所角反喋直角反

荷荇出入蒹葭

叶作藏子虛賦其卑濕則生藏葭蒹葭藏葭音

臧郎

自顧菲薄愧爾嘉祥

淋池歌

亦見三輔黃圖

拾遺記曰昭帝始元元年穿淋池廣千步東引太液之水池中植分枝荷一莖四葉狀如駢蓋花葉離葢芬馥之氣徹十餘里宮人貴之每遊宴出入必皆含爵或剪以爲衣或折以蔽日以爲戲弄帝

時命水嬉以丈梓為船木蘭為柁刻飛鸞翔鶴飾
於船首隨風輕漾畢景忘歸乃至通夜使宮人歌
曰

秋素景兮泛洪波揮纖手兮折芰荷涼風淒淒揚棹歌
雲光開曙月低河萬歲為樂豈云多

趙幽王友

高帝子

幽歌

漢書曰幽王友高帝之子孝惠時友以諸呂女為
后不愛愛它姬諸呂女讒之於太后太后怒召趙
王置邸令衛園守之趙
王餓乃作歌遂幽死

諸呂用事兮劉氏微迫脅王侯兮彊授我妃我妃既妬

兮誣我以惡

反一故

讒女亂國兮上曾不悟我無忠良

史記

作臣

兮何故棄國自決中野兮蒼天與

史記作舉

直于嗟不可

悔兮寧早自財爲王餓歿兮誰者憐之呂氏絕理兮託

天報仇

朱虛侯章

齊悼惠王次子呂太后元年入宿衛封文帝二年以誅諸呂功封城陽王

耕田歌

耕一作種

史記曰諸呂擅權用事朱虛侯劉章忿劉氏不得職嘗入侍宴太后令爲酒史章自請曰臣將種也

請以軍法行酒太后曰可酒酣章進飲歌舞請為
耕田歌頃之諸呂有一人醉亡酒章追拔劒斬之
太后大驚業已許
其軍法無以罪也

溪耕概種立苗欲疏非其種

一作類

者鋤而去之

淮南王安

厲王長子文帝時封為淮南王好書鼓琴
不喜弋獵招致賓客方術之士後與賓客

左吳日夜為反謀事覺廷尉逮捕安欲發兵猶
豫未決帝使宗正以符節治安未至安自刑

八公操

一曰淮南操古今樂錄曰淮南好
道正月上辛八公來降王作此歌

煌煌上天照下土兮知我好道公來下兮公將與予生

毛羽兮超騰青雲蹈梁甫兮觀見瑤光過北斗兮馳棄
風雲使玉女兮含精吐氣嚼芝草兮悠悠將將天相保

兮

燕刺王旦

武帝第四子

歌二首

漢書曰昭帝時旦自以為武帝子且長不得立乃
與旦姊蓋長公主左將軍上官桀交通謀廢帝迎
立燕倉知其謀告之由是發覺王憂懣置酒萬載
宮會賓客羣臣妃妾坐飲王自歌華容夫人起舞
坐者皆泣
王遂自殺

王歌

歸空城兮狗不吠雞不鳴
橫術何廣廣兮固知國中之
無人

華容夫人歌

附

髮紛紛兮寘

從十反

渠骨籍籍兮亾居母求
歿子兮妻求

歿夫裴回兩渠間兮君子將安居

廣陵厲王胥

武帝第五子

瑟歌

漢書曰昭帝時胥見帝年少無子有覬覦心迎女
巫李女須使下神呪詛宣帝即位呪詛事發覺胥
置酒顯陽殿召太子霸及子女等夜飲使所幸鼓
瑟歌舞王自歌左右悉涕泣奏酒至雞鳴時罷

欲久生兮無終長不樂兮安窮奉天期兮不得須臾干

里馬兮駐待路黃泉下兮幽溪人生要死何爲苦心何

用爲樂心所喜出入無悰爲樂亟丘吏反蒿里名兮郭門

閔死不得取代庸身自逝叶上列反

廣川王去繆王齊太子

歌二首

漢書曰廣川王去以陽城昭信為后幸姬陶望卿
為脩靡夫人主繒帛雀脩成為明貞夫人主永巷
後昭信譖望卿失寵去與昭信等飲諸婢皆侍去
為望卿作歌曰背尊章竟殺望卿昭信欲擅愛曰
王使明貞夫人主諸姬淫亂難禁乃盡閉諸姬舍
門上箴於后非大置酒召不得見去憐之為作歌
曰愁莫愁按西京雜
記作廣川王去疾

望卿歌

背尊章嫖

匹昭反

以忽謀屈奇起自絕行周流自生患諒

非望今誰怨

脩成歌

愁莫愁生無聊心重結意不舒
內第鬱憂哀積上不見
天生何益日崔隤時不再願棄軀
死無悔

古詩紀卷十一

欽定四庫全書

古詩紀卷十二

明 馮惟訥 撰

漢第二

項羽

名籍沛國下相人也先世世為楚將秦亂起兵自稱西楚霸王後為漢高帝所滅

垓下歌

樂府作力拔山操

漢書曰高祖圍項羽垓下是夜聞漢軍皆楚歌驚曰漢已得楚乎起飲帳中有美人姓虞氏常從駿馬名騅常騎之乃悲歌慷慨自為歌數闋美人和之羽泣下數行遂上馬潰圍南出平明漢軍乃覺

力拔山兮氣蓋世時不利兮騅不逝騅不逝兮可奈何
虞兮虞兮奈若何

四皓

東園公姓韓名秉字宣明綺里李姓朱名暉字文季夏黃公姓崔名廓字少通齊人角里先生

姓周名述字元道河
內人四人俱隱商山

采芝操

一作紫
芝歌

古今樂錄曰南山四皓隱居高祖聘之四皓不出
仰天歎而作歌崔鴻曰四皓為秦博士遭世暗昧
坑黜儒術於是退而作
此歌亦謂之四皓歌

皓天嗟嗟溪谷逶迤樹木莫莫高山崔嵬巖居穴處以

爲幄茵曄曄紫芝可以療饑唐虞往矣吾當安歸

紫芝歌

一曰四皓歌

莫莫高山

一作漢漠商洛

溪谷逶迤曄曄紫芝可以療饑唐虞

世遠吾將何

一作安

歸駟馬高蓋其憂甚大富貴之畏人

兮不若貧賤之肆志

一作富貴而畏人不如貧賤而輕世

韋孟

諷諫詩

漢書曰孟魯國鄒人也家本彭城爲楚元王傅傳子夷王及孫王戊戌荒淫不遵道孟作詩諷諫後

遂去位徙家於鄒又作一篇孟卒於鄒或曰其子孫好事述先人之志而作是詩也

肅肅我祖國自豕韋黼衣朱紱四牡龍旂彤弓斯征撫
寧遐荒總齊羣邦以翼大商迭彼大彭勲績維光至于
有周歷世會同王赧聽譖實絕我邦我邦既絕厥政斯
逸賞罰之行非繇王室庶尹羣后靡扶靡衛五服崩離
宗周以墜我祖斯微遷于彭城在予小子勤唉呼來許其二反
厥生阨此嫚秦耒耜斯耕悠悠嫚秦上天不寧乃眷南
顧授漢于京於赫有漢四方是征靡適不懷萬國攸平

乃命厥弟建侯于楚俾我小臣惟傳是輔矜矜元王恭
儉靜一惠此黎民納彼輔弼享國漸世垂烈于後迺及
夷王克奉厥緒一作次咨命不永惟王統祀左右陪臣斯

惟皇士如何我王不思守保不惟履氷以繼祖考邦事
是廢逸游是娛犬馬悠悠是放是驅務此鳥獸忽此稼
苗烝民以匱我王以媮所弘匪德所親匪俊唯圉是恢
唯諛是信喻喻諂夫諤諤黃髮如何我王曾不是察既
藐下臣追欲縱逸慢彼顯祖輕此削黜嗟嗟我王漢之

睦親曾不夙夜以休令聞穆穆天子照臨

漢書作臨爾

下土

明明羣司執憲靡顧正遐由近殆其怙茲

文選作茲怙

嗟嗟

我王曷不斯思匪思匪監嗣其罔則彌彌其逸岌岌其

國致冰匪霜致墜匪嫚瞻惟我王時

漢書作昔

靡不練興國

救顛孰違悔過追思黃髮秦繆以霸歲月其徂年其逮

耆於赫

漢書作昔

君子庶顯于後我王如何曾不斯覽

音黃

髮不近胡不時鑒

在鄒詩

微微小子既耆且陋豈不幸位穢我王朝王
朝肅清唯俊之庭顧瞻余躬懼穢此征我之
退征請于天子天子我恤矜我髮齒赫赫天
子明哲且仁懸車之義以洎小臣嗟我小子
豈不懷土庶我王寤越遷于魯既去禰祖
惟懷惟顧祁祁我徒戴負盈路爰戾于鄒
鬻剪茅作堂我從一作徒我環築室于牆我既遷
逝心存我舊夢我瀆上立于王朝其夢如何
夢爭王室其爭如何夢王我弼寤其外邦歎
其喟然念我祖考泣涕其漣微微老夫咨

既遷絕洋洋仲尼視我遺烈濟濟鄒魯禮義唯恭誦習
絃歌異于他邦我雖鄙耆心其好而我徒侃爾樂亦在
而

東方朔

字曼倩平原厭次人武帝時待詔公車以談諧自見稍得親近累遷大中大夫給事中

誠子詩

漢書取前十句為東方贊

明者處世莫尚于中優哉游哉於道相從首陽爲拙柳
惠爲工飽食安步以仕代農依隱玩世詭時不逢才盡
身危好名得華有羣累生孤貴失和遺餘不匱自盡無

多聖人之道一龍一蛇形見神藏與物變化隨時之宜
無有常家

霍去病

大將軍衛青姊子也善騎射再從大將軍為
票姚校尉封冠軍侯後為票騎將軍數征匈奴

奴有功益封萬二千戶為大司馬

琴歌

古今樂錄曰霍將軍去病益封萬五千戶秩祿與
大將軍等於是志得意歡而作歌按琴操有霍將
軍渡河操去
病所作也

四夷既護

一作獲

諸夏康兮國家安寧樂無

一作未

央兮載

戢干戈弓矢藏兮麒麟來臻鳳凰翔兮與天相保永無疆兮親親百年各延長兮

司馬相如

字長卿成都人以贊為郎事孝景帝為武騎常侍因病免後武帝召為郎以辭賦得

幸常有消渴病既免家居茂陵史稱其多識博物蔚為辭章賦頌之首

封禪頌

史記曰長卿病甚武帝使所忠往求其書及至長卿已卒其妻曰長卿未死時為一卷書曰有使來求書奏之其遺札書言封禪事所忠奏焉

自我天覆雲之油油甘露時雨厥壤可游滋液滲漉何

生不育嘉穀六穗我穡曷蓄非唯雨之又潤澤之非唯

徧之我

史記無我字

汜布濩之萬物熙熙懷而慕思名山顯

位望君之來君乎君乎侯不邁哉般般之獸樂我君圃

一作

白質黑章其儀可嘉旼旼

旼音是

穆穆君子之能

漢書

態作

蓋聞其聲今觀其來厥塗靡蹤

漢書作從

天瑞之徵茲亦

於舜虞氏以興濯濯之麟游彼靈時孟冬十月君徂郊

祀馳我君興帝用享祉三代之前蓋未嘗有宛宛黃龍

興德而升采色炫燿燿

漢書作煥

炳輝煌正陽顯見覺悟黎

蒸於傳載之云受命所乘厥之有章不必諄諄依類託

寓諭以封巒

此頌周詩遺軌亦載分四章未知何據按史稱相如為詞章賦頌之首而世俗所傳

止琴歌二章殊非雅製此篇典則瑰奇得雅頌遺聲故特著之

琴歌二首

漢書曰司馬相如客臨邛富人卓王孫為具召之相如時從車騎雍容閒雅甚都卓有女文君新寡相如以琴心挑之文君竊從戶窺心悅而好之乃夜亡奔相如相如與馳歸成都

鳳兮鳳兮歸故鄉遨遊四海求其凰時未遇兮無所將

何悟今夕兮升斯堂有豔淑女

玉臺有兮字

在閨房室邇人

遐毒我腸何緣交頸爲鴛鴦胡頡頏兮共翱翔

鳳兮鳳兮從我棲得托葦尾永爲妃交情通體

玉臺作意

心

和諧中夜相從知者誰雙翼俱起翻高飛無感我思

玉臺

作心使余悲

蘇武

字子卿京兆人武帝天漢二年以中郎將使匈奴十九年不屈節會昭帝與匈奴和親得歸漢

拜爲典屬國宣

帝神爵二年卒

詩四首

骨肉緣枝葉結交亦相因四海皆兄弟誰爲行路人況

我連枝樹與子同一身昔爲鴛與鴦今爲參與辰昔者
常相近邈若胡與秦惟念當乖離恩情日以新鹿鳴思
野草可以喻嘉賓我有一尊酒欲以贈遠人願子畱斟酌
叙此平生親

結髮爲夫妻恩愛兩不疑歡娛在今夕燕婉及良時征
夫懷往路起視夜何其音基參辰俱已沒去去從此辭行

役在戰場相見未有期握手一長歎淚爲生別滋努力

愛春華莫忘歡樂時生當復來歸死當長相思

玉臺新
詠作畱

別妻

黃鵠一遠別千里顧徘徊胡馬失其羣思心常依依何
況雙飛龍羽翼臨當乖幸有絃歌曲可以喻中懷請爲
遊子吟泠泠一何悲絲竹厲清聲慷慨有餘哀長歌正
激烈中心愴以摧欲展清商曲念子不得歸俛仰內傷
心淚下不可揮願爲雙黃鵠送子俱遠飛

燭燭晨明月馥馥我

補註曰當作杖

蘭芳芬馨良

一作長

夜發隨

風聞我堂征夫懷遠路遊子戀故鄉寒冬十二月晨起

踐嚴霜俯觀江漢流
仰視浮雲翔良友遠
別離各在天一方
山海隔中州相去悠
且長嘉會難再遇
歡樂殊未

央願君

一作言

宗令德隨時愛景光

李陵

字少卿廣之孫也為騎都尉天漢中將步卒五千擊匈奴轉鬬矢盡遂降虜單于以女妻之立為右校王在匈奴二十餘年卒詩品曰李陵詩其源出於楚辭文多悽愴怨者之流陵名家子有殊才生命不諧聲顧身喪使陵不遭辛苦其文亦何能至此

與蘇武詩三首

良時不再至離別在須臾
屏營衢路側執手意踟躕
仰

視浮雲馳奄忽互相踰風波一失所各在天一隅長當
從此別且復立斯湏欲因晨風發送子以賤軀

携手上河梁遊子暮何之徘徊蹊路側悵悵一作悵悵不能

辭行人難久留各言長相思安知非日月弦望自有時

努力崇明德皓首以爲期

嘉會難再遇三載爲千秋臨河濯長纓念子一作別悵悠

悠遠望悲風至對酒不能酬行人懷往路何以慰我愁

獨有盈觴酒與子結綢繆

別歌

漢書曰昭帝即位數年匈奴與漢和親漢使求蘇武等單于許武還李陵置酒賀武曰異域之人一別長絕因起舞而歌
泣下數行遂與武決

徑萬里兮度沙漠爲君將兮奮匈奴路窮絕兮矢刃摧
士衆滅兮名已隤老母已死雖欲報恩將安歸

李延年

中山人故倡也坐法腐刑給事狗監中善歌爲新變聲所造詩謂之新聲曲女弟李夫人

得幸於武帝延年由是貴爲協律都尉

歌一首

漢書外戚傳曰李延年性知音善歌舞武帝愛之延年侍上起舞歌云云上歎息曰世豈有此人乎
平陽主因言延年有女弟上召見之實妙麗善舞由是得幸

北方有佳人絕世而獨立一顧傾人城再顧傾人國寧不知傾城與傾國佳人難再得

楊惲

字子幼宣帝時人以兄忠任為郎霍氏謀反惲先以聞封平通侯遷中郎將惲居殿中廉潔無

私然伐其行治又好發人陰伏由是多怨與太僕戴長樂相失長樂上書告惲罪免為庶人後坐怨望誅

拊缶歌

漢書惲答孫會宗書云田家作苦歲時伏臘烹羊
魚羔斗酒自勞家本秦也能為秦聲婦趙女也惟
善鼓瑟奴婢歌者數人酒後耳
熱仰天拊缶而呼烏烏其歌曰

田

音

彼南山蕪穢不治種一頃豆落而為其人生行樂

耳須富貴何時

韋玄成

字少翁孟六世孫以明經擢為諫議大夫遷
大河都尉後繼父爵為扶陽侯累遷太常坐

楊惲黨
友免官

自劾詩

漢書曰玄成以列侯侍祀孝惠廟當晨入廟天雨
淖不駕駟馬車而騎至廟下有司劾奏等輩數人

皆削爵為關內侯玄成自
傷敗黜父爵作詩自劾責

赫矣我祖侯于豕韋賜命建伯有殷以綏厥績既昭車
服有常朝宗商邑四牡翔翔德之令顯慶流于裔宗周
至漢羣后歷世肅肅楚傳輔翼元夷厥駟有庸惟慎惟
祇嗣王孔佚越遷于鄒五漢書作至世曠僚至我節侯惟我
節侯顯德遐聞左右昭宣五品以訓既耆致位惟懿惟
貞厥賜祁祁百金洎館國彼扶陽在京之東惟帝是留
政謀是從繹繹六轡是列是理威儀濟濟朝享天子天

子穆穆是宗是師四方遐邇觀國之輝茅土之繼在我
俊兄惟我俊兄是讓是形於休厥德於赫有聲致我小
子越留于京惟我小子不肅會同嬖彼車服黜此附庸
赫赫顯爵自我隊之微微附庸自我招之誰能忍媿寄
之我顏誰將遐征從之夷蠻於赫三事匪俊匪作於蔑
小子終焉其度誰謂華高企其齊而誰謂德難厲其庶
而嗟我小子于貳其尤隊彼令聲申此擇辭四方羣后
我監我視威儀車服唯肅是履

戒子孫詩

漢書曰元帝即位以立成為少府遷太子太傅至
御史大夫永光中代于定國為丞相貶熙十年之
間遂繼父相位封侯故國榮當世焉立成
復作詩著復玷缺之難難因以戒示子孫

於肅君子既令厥德儀服此恭棣棣其則咨予小子既
德靡逮曾是車服荒嫚以隊明明天子俊德烈烈不遂
我遺恤我九列我既茲恤惟夙惟夜畏忌是申供事靡
惰天子我監登我三事顧我傷隊爵復我舊我既此登
望我舊階先后茲度漣漣孔懷司直御事我熙我盛羣

公百僚我嘉我慶于異卿士非同我心三事惟難莫我
肯矜赫赫三事力雖此畢非我所度退其罔日昔我之
隊畏不此居基庶反今我度茲戚戚其懼唯一作嗟我後人
命其靡常靖共爾位瞻仰靡荒慎爾會同戒爾車服無
媚爾儀以保爾域爾無我視不慎不整我之此復惟祿
之幸於戲後人惟肅惟栗無忝顯位以蕃漢室

息夫躬

字子微河陽人哀帝初躬與孫寵誣構東平王雲祠祭呪詛事上擢躬為左曹給事封宜

陵侯又歷詆公卿上疏論事語皆險譎丞相御史奏躬舉過免官坐怨恨呪詛繫詔獄躬仰天大嘯

絕咽而死

絕命詞

漢書曰躬初待詔數危言高論自恐
遭害著絕命辭後數年乃死如其文

玄雲決鬱將安歸兮鷹隼橫厲鸞徘徊兮矰若浮歟動
則機兮叢棘棧棧曷可栖兮發忠忘身自繞罔兮冤頸
折翼庸得往兮涕泣流兮萑蘭心結帽兮傷肝虹蜺曜
兮日微孽杳冥兮未開痛入天兮嗚嘯冤際絕兮誰語
仰天高兮自列招上帝兮我察秋風為我唵浮雲為我

陰嗟若是兮欲何留撫神龍兮攬其須游曠迥兮反亡
期雄失據兮世我思

唐山夫人

高帝姬韋昭
曰唐山姓也

安世房中歌

十六
章

漢書禮樂志曰漢房中祠樂高祖唐山夫人所作
也周有房中樂至秦改名曰壽人凡樂樂其所生
禮不忘其本高祖樂楚聲故房中樂楚聲也孝惠
二年使樂府令夏侯寬備具簫管更名安世樂

大孝備矣休德昭明高張四縣音懸樂克宮庭芬樹羽林

雲景杳冥金支秀華庶旒翠旌

七始華始肅倡和聲神來晏娛嬉庶幾是聽粥粥音送

細齊

側皆反

人情忽乘青玄熙事備成清思聊聊經緯冥

冥

我定歷數人告其心敕身齊戒施教申申乃立祖廟敬
明尊親大矣孝熙四極爰轅

王侯秉德其鄰翼翼顯明昭式清明罔矣皇帝孝德竟
全大功撫安四極

海內有姦紛亂東北詔撫成師武臣承德行樂交逆蕭

勺羣慝肅爲濟哉蓋定燕國

大海蕩蕩水所歸高賢愉愉民所懷太行崔百卉殖民
何貴貴有德

安其所樂終產樂終產世繼緒飛龍秋游上天高賢愉
樂民人

豐草萋女羅施善如何誰能回大莫大成教德長莫長
被無極

雷震震電耀耀明德鄉治本約治本約澤弘大加被寵

咸相保德施大世曼壽

都荔遂芳窠桂華孝奏天儀若日月光禳玄四龍回
馳北行羽旄殷盛芬哉亾亾孝道隨世我署文章

桂華

馮馮翼翼承天之則吾易久遠燭明四極慈惠所愛美

若休德杳杳冥冥克綽永福

美芳 劉奉世曰桂華美芳皆二詩章名本側註在

前篇之末傳寫之誤遂以冠後後詞無美芳亦當作美若

磴磴卽卽師象山則嗚呼孝哉案撫戎國蠻夷竭歡象
來致福兼臨是愛終無兵革

嘉薦芳矣告靈饗矣告靈既饗德音孔臧惟德之臧建

侯之常承

一作永

保天休令問不忘

皇皇鴻明蕩矣休德嘉承天和伊樂厥福在樂不荒惟

民之則浚則師德下民咸殖令問在舊孔容翼翼

漢書自浚

則以下別為一章

今從樂府

孔容之常承帝之明下民之樂子孫保光承順溫良受
帝之光嘉薦令芳壽考不忘

承帝明德師象山則雲施稱民永受厥福承容之常承

帝之明下民安樂受福無疆

戚夫人

春歌

一作永巷歌

漢書外戚傳曰高帝得定陶戚姬愛幸生趙隱王如意惠帝立呂后為皇太后乃令永巷囚戚夫人髡鉗衣赭衣令舂戚夫人舂且歌太后聞之大怒曰乃欲倚子邪召趙王殺之戚夫人遂有人彘之禍

子為王母為虜終日春薄暮常與死為伍相離三千里

當誰使告汝

烏孫公主

悲愁歌

漢書西域傳曰武帝元封中遣江都王建女細君為公主以妻烏孫王昆莫公主至其國自治宮室居歲時一再與昆莫會置酒飲食昆莫年老言語不通公主悲乃自作歌

吾家嫁我兮天一方
遠托異國兮烏孫王
穹廬為室兮
氊為牆以肉為食
兮酪為漿
居常土思兮
心內傷
願為黃鵠兮
歸故鄉

趙飛燕

本長安宮人屬陽阿主家學歌舞成帝過主見而悅之召入為婕妤後立為后

歸風送遠操

西京雜記曰趙后有寶琴曰鳳凰皆以金玉隱起為龍鳳螭鸞古賢列女之象亦善為歸風送遠之操

涼風起兮天隕霜懷君子兮渺難望感予心兮多慨慷

班婕妤

左曹越騎校尉况之女少有才學成帝選入宮以為婕妤後趙飛燕譖其呪詛考問之上

善其對遂求供養太后長信宮○詩品曰婕妤詩其源出於李陵團扇短章辭旨清捷怨深文綺得匹婦之致侏儒一節可以知其工矣

怨歌行

新裂

一作製

齊紈素皎

一作鮮

潔如霜雪裁成

一作為

合歡扇

團團

一作團圓

似明月出入君懷袖動搖微風發常恐秋節

至涼飈

一作風

攸炎熱棄捐篋笥中恩情中道絕

虞美人

答項王楚歌

因學紀聞曰太史公述楚漢春秋其不載於書者正義云項羽歌美人和之云云是時已為五言矣

五言始于五子之歌行露

漢兵已略地四面楚歌聲大王意氣盡賤妾何聊生

卓文君

白頭吟

樂府作
古辭

西京雜記曰司馬相如將聘茂陵人女
為妾文君作白頭吟以自絕相如乃止

皚如山上雪皎若雲間月聞君有兩意故來相決絕今
日斗酒會明旦溝水頭蹀躞御溝上溝水東西流淒淒
復淒淒嫁娶不須啼願得一心人白頭不相離竹竿何

嫋嫋魚尾何筵筵男兒重意氣何用錢刀為

右一曲
本辭

皚如山上雪皎如雲間月聞君有兩意故來相決絕

一解

平生共城中何嘗斗酒會今日斗酒會明旦溝水頭蹀

蹀御

一作向

溝上溝水東西流

二解

郭東亦有樵郭西亦有

樵兩樵相推與無親為誰驕

三解

淒淒重淒淒嫁娶亦不

啼願得一心人白頭不相離

四解

竹竿何嫋嫋魚尾何離

篴男兒欲相知何用錢刀為齧如

如字下或有五字

馬噉箕川

上高士嬉今日相對樂延年萬歲期

五解

右一曲晉樂所奏

王昭君

名嬙漢宮人元帝時匈奴朝以嬙配之號寧胡閼氏

怨詩

漢元帝後宮既多不得常見乃使畫工圖其貌按圖召幸宮人皆賂畫工昭君自恃其貌獨不與乃惡圖之及後匈奴入朝選美人配之昭君之圖當行及入辭光彩射人悚動左右天子方重信外國悔恨不及窮按其事畫工有杜陵毛延壽弃市籍其貳財昭君在胡作詩以怨思云

秋木萋萋其葉萎黃有鳥處山集于芭桑養育毛羽形

一作儀

容生光既得升雲上遊曲房離宮絕曠身體摧藏

志念抑沈不得頡頏雖得委食心有徊徨我獨伊何來

一作改

往變常翩翩之鸞遠集西羌高山戕戕河水泱泱

父兮母兮道里悠長嗚呼哀哉憂心惻傷

古詩紀卷十二

欽定四庫全書

古詩紀卷十三

明 馮惟訥 撰

漢第三

靈帝

諱宏河間孝王之曾孫先封解讀亭侯桓帝薨竇武迎立在此二十二年

招商歌

拾遺記云靈帝初平三年遊於西園起裸遊館千間采綠苔而被堦引渠水以繞砌周流澄澈乘船遊漾選玉色宮人執篙楫又奏招商之曲以來涼風歌曰

涼風起兮日照渠青荷晝偃葉夜舒惟日不足樂有餘

清絲流管歌玉鳧

名曲

千年萬歲嘉難踰

拾遺記渠中植蓮大如蓋長一

丈南國所獻其葉夜

舒畫卷名夜舒荷

東平憲王蒼

光武子

武德舞歌詩

東觀漢紀曰明帝永平三年八月公卿奏世祖廟舞名東平王蒼議以漢制宗廟各奏其樂不皆相襲光武皇帝撥亂中興武功盛大廟樂舞宜曰大武之舞乃進武德舞歌詩遂用之於光武廟焉

於穆世廟肅雍顯清俊又翼翼秉文之成越序上帝駿奔來寧建立三雍封禪泰山章明圖讖放唐之文休矣

惟德罔射協同本支百世永保厥功

馬援

字文淵扶風茂陵人為漢伏波將軍征交趾緣海而進隨山刊道千餘里十八年軍至始平之

封新息侯後征武陵蠻卒於軍

武溪深行

崔豹古今註云武溪深馬援為南征之所作援門生袁寄生善吹笛援作歌以和之

滔滔武溪一何深鳥飛不度獸不敢

古今註作能

臨嗟哉武

溪

古今註有今字

多毒淫

梁鴻

字伯鸞平陵人家貧而尚節介隱居霸陵山中後居吳臯伯通舍之於家鴻潛避著書十餘篇

卒於
吳

五噫歌

後漢書曰梁鴻東出關過京師作五
噫之歌肅宗聞而悲之求鴻不得

陟彼北芒

一作
印

兮噫顧瞻

一作
覽

帝京兮噫宮闕崔巍兮

噫民之劬勞兮噫遠遼未央兮噫

適吳詩

漢書曰鴻易姓運期名耀字侯光與妻子
居齊魯之間有頃又去適吳將行作詩曰

逝舊邦兮遐征將遙集兮東南心愴怛兮傷悴忘

一作
志

菲菲兮升降欲乘策兮縱邁疾吾俗兮作讒競舉枉兮
措直咸先佞兮延延固靡慙兮獨建冀異州兮尚賢聊
逍遙兮遨嬉纘仲尼兮周流儻云覩兮我悅遂舍車兮
即浮過季札兮延陵求魯連兮海隅雖不察兮光貌幸
神靈兮與休惟季春兮華阜麥舍英兮方秀哀茂時兮
逾邁愍芳香兮日臭悼我心兮不獲長委結兮焉究口
囂囂兮余訕嗟恇恇兮誰留

思友詩

一作思
高懷

漢書曰鴻友人京兆高恢少好老子隱於華陰山中及鴻東遊思恢作詩二人遂不復相見恢亦高抗終身不仕

烏嚶嚶兮友之期念高子兮僕懷思想念恢兮爰集茲

班固

字孟堅顯宗時除蘭臺令史遷為郎後遷玄武司馬以母喪去官永元初大將軍憲征匈奴以

為中護軍諸子多不遵法憲敗免官洛陽令种兢捕繫固遂死獄中

明堂詩

固作東都賦
系此五詩

於昭明堂明堂孔陽聖皇宗祀穆穆皇上帝宴饗五

位時序誰其配之世祖光武普天率土各以其職猗歟
緝熙允懷多福

辟雍詩

乃流辟雍辟雍湯湯聖皇涖止造舟爲梁皤皤國老乃
父乃兄抑抑威儀孝友光明於赫太上示我漢行洪化
惟神永觀厥成

靈臺詩

乃經靈臺靈臺既崇帝勤時登爰考休徵三光宣精五

行布序習習祥風祁祁甘雨百穀蓁蓁庶草蕃廡一作蕪
屢惟豐年於皇樂胥

寶鼎詩

嶽修貢兮川效珍吐金景兮歆浮雲寶鼎見兮色紛緼
煥其炳兮被龍文登祖廟兮享聖神昭靈德兮彌億年

白雉詩

啓靈篇兮披瑞圖獲白雉兮效素烏嘉祥阜兮集皇都
發皓羽兮奮翹英容潔朗兮於純精彰皇德兮侔周成

永延長兮膺天慶

郊祀靈芝歌

見太平御覽

漢書曰班固頌漢論

功歌詩靈芝歌曰

因露寢兮產靈芝象三德兮瑞應

一作應瑞

圖延壽命兮光

此都配上帝兮象太微參日月兮揚光輝

詠史

詩品曰孟堅才流而老於掌故觀其詠史有感歎之詞

三王德彌薄惟後用肉刑太倉令有罪就逮長安城自恨身無子困急獨筑筑小女痛父言死者不可生上書

詣闕下思古歌雞鳴

一作上書詣北闕闕下歌雞鳴

憂心摧折裂晨風

揚激聲聖漢孝文帝惻然感至情百男何憤憤不如一

緹紫

傳毅

字武仲扶風茂陵人建初中肅宗以毅為蘭臺令史拜郎中與班固賈逵共典校書後為竇憲

記室遷司馬卒

迪志詩

漢書曰毅永平中於平

陵習章句因作迪志詩

咨爾庶士迨時斯曷日月逾邁豈云旋復哀我經營

力靡及在茲弱冠靡所樹立於赫我祖顯于殷國貳迹
阿衡克光其則武丁興商伊宗皇士爰作股肱萬邦是
紀奕世載德迄我顯考保膺淑懿續修其道漢之中葉
俊乂式序秩彼殷宗光此勲緒伊余小子穢陋靡逮懼
我世烈自茲以墜誰能革濁清我濯漑誰能昭闇啓我
童昧先人有訓我訓我誥訓我嘉務誨我博學爰率朋
友尋此舊則契閣夙夜庶不懈忒秩秩大猷紀綱庶式
匪勤匪昭匪壹匪測農夫不怠越有黍稷誰能云作者

之居息二事敗業多疾我力如彼遵衢則罔所極二志
靡成聿勞我心如彼兼聽則溷於音於戲君子無恒自
逸徂年如流鮮茲暇日行邁屢稅胡能有迄密勿朝夕
聿同始卒

崔駟

字亭伯涿郡安平人也少遊太學與班固傅毅
齊名竇憲為車騎將軍辟駟為掾憲擅權驕恣

駟數諫之稍見疎出為長岑
長不就永元四年卒於家

安封侯詩

戎馬鳴兮金鼓震壯士激兮忘身命被光甲兮跨良馬

揮長戟兮彀

藝文作廊

强弩

張衡

字平子南陽西鄂人安帝時徵拜為郎中再遷太史令順帝陽嘉中遷侍中宦官懼其毀已共

讒之出為河間王相三年上書乞骸骨徵拜尚書卒

怨篇

丈心雕龍曰張衡怨篇清曲可誦

猗猗秋蘭植彼中阿有馥其芳有黃其葩雖曰幽深厥

美彌嘉之子之

一作云

遠我勞如何

同聲歌

邂逅承際會得克君後房情好新交接恐慄若探湯不

才勉自竭賤妾職所當綢繆主中饋奉禮助烝嘗思爲
苑弱席在下蔽匡牀願為羅衾幘在上衛風霜灑掃清
枕席鞮芬以狄一作秋香重戶結金扃高下華燈光衣解
巾粉御列圖陳枕張素女爲我師儀態盈萬方衆夫所
希見天老教軒皇樂莫斯夜樂沒齒焉可忘

定情歌

大火流兮草蟲鳴繁霜降兮草木零秋為期兮時已征
思美人兮愁屏營

四愁詩

并序

張衡不樂久處機密陽嘉中出爲河間相時國王驕奢不遵法度又多豪右并兼之家衡下車治威嚴能內察屬縣姦猾行巧劫皆密知名下吏收捕盡服擒諸豪俠遊客悉惶懼逃出境郡中大治爭訟息獄無繫囚時天下漸弊鬱鬱不得志爲四愁詩效屈原以美人爲君子以珍寶爲仁義以水深雪零爲小人思以道術爲報貽於時君而懼讒邪不得以通其辭曰

一思曰

玉臺無此三字劉履曰衍文也下放此

我所思兮在太山欲往從

之梁父艱側身東望涕沾翰美人贈我金錯刀何以報之英瓊瑤路遠莫致倚逍遙何為懷憂心煩勞

二思曰我所思兮在桂林欲往從之湘水深側身南望

涕沾襟美人贈我金

五臣作琴

琅玕何以報之雙玉盤路遠

莫致倚惆悵何為懷憂心煩傷

三思曰我所思兮在漢陽欲往從之隴阪長側身西望

涕沾裳美人贈我貂襜褕

出占反

何以報之明月珠路遠

莫致倚踟躕何爲懷憂心煩紆

四思曰我所思兮在鴈門欲往從之雪雰雰側身北望
涕沾巾美人贈我錦繡段何以報之青玉案路遠莫致

倚增歎何爲懷憂心煩惋

烏玩反

思玄詩

衡爲太史今嘗憂及
難作思玄賦系此詩

天長地久歲不留俟河之清祇懷憂願得遠度以自娛
上下無常窮六區超踰騰躍絕世俗飄飄神舉逞所欲

天不可階仙夫稀栢舟悄悄客不飛松喬高跼誰能離
結精遠遊使心攜迴志竭來從玄謀獲我所求夫何思

李尤

字伯仁廣漢雒人也少以文章顯和帝時
拜蘭臺令史後為諫議大夫遷樂安相

九曲歌

年歲晚暮時已斜安得力士翻日車

關

朱穆

字公叔暉之子就學銳意誦誦梁冀素聞穆
名辟之使典兵事拜御史漢桓帝徵拜尚書

與劉伯宗絕交詩

北山有鴟不潔其翼飛不正向寢不定息饑則木櫬飽

則泥伏饕餮貪汚臭腐是食填腸滿嗉嗜欲無極長鳴
呼鳳謂鳳無德鳳之所趨與子異域永從此訣各自努
力

王逸

字叔師南郡宜城人元初中舉上計吏爲校書郎累至侍中著楚詞章句其賦誄書論及雜文

凡二十一篇作漢詩百二十三篇

琴思楚歌

盛陰脩夜何難曉思念斜戾腸摧統時節晚莫年齒老
冬夏更運去若顏寒來暑往難逐追形容減少顏色虧

時忽掩掩若驚馳意中私喜施用爲內無所恃失本義
志願不得心肝沸憂懷感激重歎噫歲月已盡去奄忽
亡官失祿去家室思想君命幸復位久處無成卒放棄

桓麟

字元龍沛郡龍亢人
桓榮之孫精鑒好學

答客詩

丈士傳曰桓麟伯父烏官至太尉麟年十二在座
烏告客曰吾此弟子知有異才殊能作詩賦客乃
作詩麟即
應聲答云

邈矣甘羅超等絕倫伊彼揚烏命世稱賢嗟予蠢弱殊

才偉年仰慙二子俯媿過言

客示桓麟詩

附

甘羅十二楊烏九齡昔有二子今則桓生

高彪

字義方吳郡人志尚甚高
遊太學博覽經史善屬文

清誠

天長而地久人生則不然又不養以福使全其壽年飲
酒病我性思慮害我神美色伐我命利欲亂我真神明
無聊賴愁毒於衆煩中年棄我逝忽若風過山形氣各

分離一往不復還上士愍其痛抗志凌雲烟滌蕩去穢
累飄邈任自然退修清以淨存吾玄中玄澄心剪思慮
泰清不受塵恍惚中有物希微無形端智慮赫赫盡谷
神綿綿存

蔡邕

字伯喈陳留圉人也性篤孝建寧中辟司徒喬
玄府出補河平長召拜郎中校書東觀撰議郎

靈帝崩董卓為司空辟邕還尚書侍中
及卓被誅王允收邕付廷尉遂死獄中

答對元式詩

伊余有行爰戾茲邦先進博學同類率從濟濟羣彥如

雲如龍君子博文貽我德音辭之集矣穆如清風

答卜元嗣詩

斌斌碩人貽我以文辱此休辭非余所希敢不酬答賦
誦以歸

樊惠渠歌

并序

陽陵縣東其地衍隰土氣辛螫嘉穀不植而涇水長
流光和五年京兆尹樊君勤恤民隱乃立新渠曩之
鹵田化爲甘壤農民怡悅相與謳談疆畔斐然成章

謂之樊惠渠云其歌曰

我有長流莫或閼之我有溝澮莫或達之田疇斥鹵莫

修莫釐

藝文
作治

饑饉困悴莫恤莫思乃有樊君作人父母

立我畎畝黃潦膏凝多稼茂止惠乃無疆如何勿喜我
壤既營我疆斯成泯泯我人既富且盈爲酒爲釀蒸彼
祖靈貽福惠君壽考且寧

飲馬長城窟行

文選作古辭玉臺作
蔡邕蔡集亦載此

青青河邊草綿綿思遠道遠道不可思宿昔夢見之夢

見在我傍忽覺在他鄉他鄉各異縣展轉不可見枯桑
知天風海水知天寒入門各自媚誰肯相爲言客從遠
方來遺我雙鯉魚呼童烹鯉魚中有尺素書長跪讀素
書書中竟何如上有加餐食下有長相憶

翠鳥

庭陬

一作前

有若榴綠葉含丹榮翠鳥時來集振羽修形

容回顧生碧色動搖揚縹青幸脫虞人機得親君子庭
馴心托君素雌雄保百齡

琴歌

邕為釋論之文設
為胡老援琴而歌

練余心兮浸太清
滌穢濁兮存正靈
和液暢兮神氣寧
情志泊兮心亭亭
嗜欲息兮無由生
踔宇宙而遺俗兮
眇翩翩而獨征

趙壹

字元叔漢陽西縣人也光和元年舉郡上計是時司徒袁逢受計逢與河南尹羊陟共稱薦之

名動京師及西還州郡爭致禮
命十辟公府並不就終於家

疾邪詩二首

壹恃才倨傲為鄉黨所擯後屢抵罪幾至死友人
救得免壹作疾邪賦中歌此二詩。詩品曰元叔
散憤蘭蕙指斥囊錢苦言切句良
亦勤矣斯人也而有斯困悲夫

河清不可俟人命不可延順風激靡草富貴者稱賢文
籍雖滿腹不如一囊錢伊優北堂上骯髒倚門邊

勢家多所宜欬唾自成珠被褐懷金玉蘭蕙化為芻
者雖獨悟所困在羣愚且各守爾分勿復空馳驅哀哉
復哀哉此是命矣夫

酈炎

字文勝范陽人有文才尚志氣靈帝時州郡辟
命皆不就炎後風病恍惚性至孝遭母憂病甚

發動妻始產而驚死妻家訟
之災病不能理對竟死獄中

見志詩

大道夷且長窘路狹且促脩翼無卑棲遠趾不步局舒
吾凌霄羽奮此千里足超邁絕塵驅倏忽誰能逐賢愚
豈常類稟性在清濁富貴有人籍貧賤無天錄通塞苟
由已志士不相卜陳平敖里社韓信釣河曲終居天下
宰食此萬鍾祿德音流千載功名重山嶽

靈芝生河洲動搖因洪波蘭茝一何晚嚴霜瘁其柯哀

哉二芳草不植泰山阿文質道所貴遭時用有嘉絳灌
臨衡宰謂誼宗浮華賢才抑不用遠投荆南沙抱玉乘
龍驥不逢樂與和安得孔仲尼爲世陳四科

詩品曰文
勝托詠靈

芝懷寄
不淺

仲長統

字公理山陽高平人少好學博涉書記贍於
文辭尚書荀彧舉爲尚書郎後參丞相曹操

軍事獻帝遜
位之歲統卒

述志詩二首

飛鳥遺跡蟬蛻亡殼騰蛇棄鱗神龍喪角

盧谷切

至人能

變達士拔俗乘雲無轡騁風無足垂露成幃張霄成幄
沆瀣當餐九陽代燭恒星豔珠朝霞潤玉六合之內恣
心所欲人事可遺何爲局促

大道雖夷見幾者寡任意無非適物無可古來繚繞

漢書

作繞

委曲如瑣百慮何爲至要在我寄愁天上埋憂地

下叛散五經滅棄風雅百家雜碎請用從火抗志山棲

一作西

遊心海左元氣爲舟微風爲柁翱翔太清縱意容

冶

初學記載四句云春雲爲馬秋風爲駟按之不遲勞之不疾

孔融

字文舉魯國人孔子之後少有重名舉高第為侍御史遷虎賁中郎將以忤董卓轉議郎出為

北海太守累遷大中大夫數以書爭曹操為操所害

離合作郡姓名詩

漁父屈節水潛匿方

離魚字

與岑進止出行施張

離日字魚日合

成魯

呂公磯釣闔口渭傍

離口字

九域有聖無土不王

離或字口

或合

好是正直女回于匡

離子字

海外有截隼逝鷹揚

離當

乙字恐古文與今文不同合成孔也

六翩將奮羽儀未彰

離高字

蛇龍之蟄

俾也可忘

離虫字合成融

玟璇隱曜美玉韜光

去玉成文不須合

無名

無譽放言深藏

離與字

按轡安行誰謂路長

離才字合成舉

雜詩二首

巖巖鍾山首赫赫炎天路高明曜雲門遠景灼寒素昂
昂累世士結根在所固呂望老匹夫苟爲因世故管仲
小囚臣獨能建功祚人生有何常但患年歲暮幸托不
肖軀且當猛虎步安能苦一身與世同舉厝由不慎小
節庸夫笑我度呂望尚不希夷齊何足慕

遠送新行客歲暮乃來歸入門望愛子妻妾向人悲聞

子不可見日已潛光輝孤墳在西北常念君來遲褰裳
上墟丘但見蒿與薇白骨歸黃泉肌體成塵飛生時不
識父死後知我誰孤魂遊窮暮飄飄安所依人生圖享
息爾死我念追俛仰內傷心不覺淚沾衣人生自有命
但恨生日希

臨終詩

融為大中大夫見曹操雄詐漸著頻書爭之多致
乖忤又奏宜準古王畿之制千里窰內不以封建
諸侯操疑其所論建漸廣竝憚之郗慮承旨
以微法免融又令路粹誣奏融下獄棄市

言多令事敗器漏苦不密河潰蟻孔端山壞由猿穴涓涓河漢流天窓通冥室讒邪害公正浮雲翳白日靡辭無忠誠華繁竟不實人有兩三心安能合爲一三人成市虎浸漬解膠漆生存多所慮長寢萬事畢

六言詩三首

漢家中葉道微董卓作亂乘衰僭上虐下專威萬官惶怖莫違百姓慘慘心悲

郭李分爭爲非遷都長安思歸瞻望關東可哀夢想曹

公歸來

從洛到許魏魏曹公憂

一作輔

國無私減去厨膳甘肥羣

僚率從祈祈雖得俸祿常饑念我苦寒心悲

失題


歸家酒債多門客粲幾

一作成

行高談滿四座一日傾千

觴

又云座上客長滿樽中酒不空



古詩紀卷十三